


ফ্লয়েড ওয়ার্শাল সম্ভবত সব থেকে ছোট আকারের গ্রাফ অ্যালগোরিদম, মাত্র ৩লাইনে এটা লেখা যায়! তবে ৩ লাইনের এই অ্যালগোরিদমেই বোঝার অনেক কিছু আছে। ফ্লয়েড ওয়ার্শালের কাজ হলো গ্রাফের প্রতিটা নোড থেকে অন্য সবগুলো নোডের সংক্ষিপ্ততম দূরত্ব বের করা। এ ধরনের অ্যালগোরিদমকে বলা হয় “অল-পেয়ার শর্টেস্ট পাথ” অ্যালগোরিদম। এই লেখাটা পড়ার আগে **অ্যাডভেন্সেস ম্যাট্রিক্স** সম্পর্কে জানতে হবে।

আমরা একটা গ্রাফের উপর কিছু সিমুলেশন করে সহজেই অ্যালগোরিদমটা বুঝতে পারি। নিচের ছবিটা দেখ:




Node	1	2	3	4
1	0	3	inf	inf
2	2	0	2	inf
3	inf	5	0	inf
4	20	inf	8	0

ছবিতে চার নোডের একটা ওয়েটেড ডিরেক্টেড গ্রাফ দেখা যাচ্ছে। আর উপরে ডান কোণায় একটা ম্যাট্রিক্স। ম্যাট্রিক্সের u, v তম ঘরে বসানো হয়েছে $u-v$ এজ এর ওয়েট বা কস্ট। যাদের মধ্যে সরাসরি এজ নেই সেসব ঘরে অসীম বা ইনফিনিটি বসিয়ে দেয়া হয়েছে। আর কোনাকুনি ঘরগুলোতে মান ০ কারণ নিজের বাসা থেকে নিজের বাসাতেই যেতে কোন দূরত্ব অতিক্রম করতে হয় না!

এখন মনে করো “২” নম্বর নোডটাকে আমরা “মাঝের নোড” হিসাবে ধরলাম। মাঝের নোডকে আমরা বলবো k । তারমানে এখন $k=2$ । (আমরা একে একে সব নোডকেই মাঝের নোড হিসাবে ধরবো, **এটা যেকোন অর্ডারে করা যায়**)

এখন যেকোন এক জোড়া নোড (i, j) নাও। ধরি $i=1, j=3$ । আমরা চাই u থেকে v তে যেতে, k নোডটাকে মাঝে রেখে। তাহলে আমাদের i থেকে k তে যেতে হবে, তারপর k থেকে থেকে j তে যেতে হবে। কিন্তু লাভ না হলে আমরা এভাবে যাব কেন? আমরা k কে মাঝে রেখে যাবো কেবল যদি মোট কস্ট(cost) কমে যায়। ১ থেকে ৩ এর বর্তমান দূরত্ব $matrix[1][3]$ =ইনফিনিটি। আর যদি $k=2$ কে মাঝখানে রাখি তাহলে দূরত্ব দাড়াবে $matrix[1][2] + matrix[2][3] = 3 + 2 = 5$ । তারমানে কস্ট কমে যাচ্ছে! আমরা গ্রাফটা আপডেট করে দিতে পারি এভাবে:



Node	1	2	3	4
1	0	3	5	inf
2	2	0	2	inf
3	inf	5	0	inf
4	20	inf	8	0

আমরা ২ কে “মাঝের নোড” হিসাবে ব্যবহার করে ১ থেকে ৩ এ গিয়েছি মোট ৫ কস্ট এ। গ্রাফে তাহলে ১ থেকে ৩ এ সরাসরি একটা এজ দিয়ে দিতে পারি ৫ কস্ট এ।


এখন আবার ধর $i=2, j=4$ । আর আগের মতই $k=2$ । এবার $matrix[2][4]$ =ইনফিনিটি। এদিকে $matrix[2][2] + matrix[2][4] = 0 +$ ইনফিনিটি। এবার কিন্তু দূরত্ব কমলো না। তাই গ্রাফ আপডেট করার দরকার নেই। নিশ্চয়ই বুঝতে পারছেন আপডেটের শর্তটা হবে এরকম:

$if(matrix[i][k] + matrix[k][j] < matrix[i][j])$
 $matrix[i][j] = matrix[i][k] + matrix[k][j]$

অথবা আমরা একলাইনে লিখতে পারি:

$matrix[i][j] = \min(matrix[i][j], matrix[i][k] + matrix[k][j])$


এখন $k=2$ স্থির রেখে আমরা i, j এর সবরকমের কম্বিনেশন নিবো। তুমি নিজেই চিন্তা করলে দেখবে $k=2$ এর জন্য $i=3, j=1$ এই কম্বিনেশনে আমরা আরেকটা নতুন এজ পাবো, বাকি গ্রাফ আগের মতই থাকবে।



Node	1	2	3	4
1	0	3	5	inf
2	2	0	2	inf
3	7	5	0	inf
4	20	inf	8	0

এবার আমরা $k=1$ কে মাঝের নোড হিসাবে চিন্তা করি। মাথা খাটাতে চাইলে নিচে দেখার আগে নিজেই খাতায় একে ফেলতে পারো নতুন এজগুলো।

এবার একটা মাত্র এজ যোগ হবে। $i=4, j=2$ হলে আমরা ৪ থেকে ১ হয়ে ২ নম্বর নোডে যেতে পারি ২৩ কস্ট এ। তাহলে গ্রাফটা হবে এরকম:




Node	1	2	3	4
1	0	3	5	inf
2	2	0	2	inf
3	7	5	0	inf
4	20	23	8	0

এবার ৩ নম্বর নোডকে মাঝের নোড হিসাবে ধরবো। আবারো নিজে চেষ্টা করে তারপর নিচের অংশ দেখ।

এবার কিছু মজার জিনিস ঘটবে। ৪ থেকে ১ এ আগে লাগছিল ২০ কস্ট। এখন ৩ কে মাঝে রেখে ৪ থেকে ১ এ গেলে লাগবে $৮+৭=১৫$ কস্ট। লক্ষ্য কর একদম শুরুতে ৩ থেকে ১ এ আমাদের এজ ছিল না। কিন্তু আপডেট করার সময় আমরা এজ বসিয়ে দিয়েছি, এখন ৩ থেকে ১ এ যদিও সরাসরি

চলে যাচ্ছি, মূল গ্রাফে আসলে ৩->২->১ পথে যাচ্ছি।

একই ভাবে ৪ থেকে ২ এর ২৩ কস্ট এর পথটা আপডেট হয়ে ১৩ হয়ে যাবে।




Node	1	2	3	4
1	0	3	5	inf
2	2	0	2	inf
3	7	5	0	inf
4	15	13	8	0

k=৪ এর জন্য আর কোন আপডেট হবে না কারণ কোনো নোড থেকে ৪ এ যাওয়া যায় না।

এখন আমরা ম্যাট্রিক্স দেখেই বলে দিতে পারছি কোন নোড থেকে কোন নোডে কত কস্ট এ যাওয়া যায়। ইনফিনিটি থাকা মানে সেই নোডে যাবার পথ নেই।

ইনপুট থেকে অ্যাডজেসেন্সি ম্যাট্রিক্স বানাবার পর তাহলে কাজ খুবই সহজ:



```

1 for k from 1 to |V|
2   for i from 1 to |V| \ |V| = number of nodes
3     for j from 1 to |V|
4       if matrix[i][j] > matrix[i][k] + matrix[k][j]
5         matrix[i][j] ← matrix[i][k] + matrix[k][j]

```


কোডে আমরা k এর লুপটা ১ থেকে চালাচ্ছি যদিও উদাহরণে আগে ২ নিয়েছি। **এটা আসলে**

যেকোন অর্ডারেই করা যায়, তুমি আগে ১ নিলেও দেখবে অ্যালগোরিদম কাজ করবে।

এভাবেতো আমরা শুধু পাতের কস্ট পেলাম, পথটা িকভাবে পাব?

ধরো আমাদের একটা ম্যাট্রিক্স আছে next[i][j]। এখন next[i][j] দিয়ে আমরা বুঝি i থেকে j তে যেতে হলে পরবর্তি যে নোড এ যেতে হবে সেই নোডটা। তাহলে একদম শুরুতে সব i,j এর জন্য next[i][j] = j হবে। কারণ শুরুতে কোন “মাঝের নোড” নেই এবং তখনও শর্টেস্ট পথ বের করা শেষ হয় নি।

এখন আমরা যখন $matrix[i][j]$ আপডেট করবো লুপের সেটার মানে হলো মাঝে একটা নোড k ব্যবহার করে আমরা যাবো। লক্ষ্য কর আমরা কিন্তু মূল গ্রাফে সরাসরি এজ দিয়ে i থেকে k তে নাও যেতে পারি, আমরা শুধু জানি i, j নোড দুটোর মাঝে একটা নোড k আছে যেখানে আমাদের যেতে হবে j তে যাবার আগে। i থেকে k তে যাবার পথে পরবর্তি যে নোডে যেতে হবে সেটা রাখা আছে $next[i][k]$ তে! তাহলে $next[i][j] = next[i][k]$ হয়ে যাবে।



```

1 for k from 1 to |V|
2   for i from 1 to |V|
3     for j from 1 to |V|
4       if  $matrix[i][k] + matrix[k][j] < matrix[i][j]$  then
5          $matrix[i][j] \leftarrow matrix[i][k] + matrix[k][j]$ 
6          $next[i][j] \leftarrow next[i][k]$ 
7
8
9 findPath(i, j)
10  path = [i]
11  while  $i \neq j$ 
12     $i \leftarrow next[i][j]$ 
13    path.append(i)
14  return path

```

findPath ফাংশনে আমরা j কে ফিক্সড রেখে $next$ অ্যারে ধরে আগাচ্ছি যতক্ষণ না j তে পৌঁছাচ্ছি। তাহলে আমরা পেয়ে গেলাম পথ!


ট্রানসিটিভ ক্লোজার(Transitive Closure):

ধরো আমাদের অ্যাডজেন্সি ম্যাট্রিক্সটা এরকম:



- 1 $matrix[i][j] = 1$ যদি i থেকে j তে সরাসরি এজ থাকে
- 2 $matrix[i][j] = 0$ যদি এজ না থাকে

এখন আমরা এমন একটা ম্যাট্রিক্স তৈরি করতে চাই যেটা দেখে বলে দেয়া যাবে i থেকে j তে এক বা একাধিক এজ ব্যবহার করে যাওয়া যায় কিনা। আমরা চাইলে উপরের মত করে ০ এর জায়গায় ইনফিনিটি দিয়ে শর্টেস্ট পথ বের করে কাজটা করতে পারতাম। কিন্তু এক্ষেত্রে “OR” আর “AND” অপারেশন ব্যবহার আরো দ্রুত কাজটা করা যায়। এখন আপডেটের শর্তটা হয়ে যাবে এরকম:



1 $matrix[i][j] = matrix[i][j] \parallel (matrix[i][k] \&\& matrix[k][j])$

এটার মানে $matrix[i][j]$ তে তখনই ১ বসবে যখন হয় “ $matrix[i][j]$ তে ১ আছে” অথবা “ $matrix[i][k]$ এবং $matrix[k][j]$ ” দুটোতেই ১ আছে। তারমানে হয় সরাসরি যেতে হবে অথবা মাঝে একটা নোড k ব্যবহার করে যেতে হবে।

কমপ্লেক্সিটি:

৩টা নেস্টেড লুপ ঘুরছে নোড সংখ্যার উপর, টাইম কমপ্লেক্সিটি $O(n^3)$ । ২ডি ম্যাট্রিক্স ব্যবহার করায় স্পেস কমপ্লেক্সিটি $O(n^2)$ ।

কিছু প্রশ্ন:

১. k এর লুপটা কি i, j লুপের ভিতর দিলে অ্যালগোরিদম কাজ করত?
২. গ্রাফে নেগেটিভ কস্ট থাকলে ফ্লয়েড ওয়ারশাল কাজ করবে কি?

রিলেটেড প্রবলেম:

Page Hopping

05-2 Rendezvous

Minimum Transport Cost

Asterix and Obelix

আরো অনেক প্রবলেম

হ্যাঁপি কোডিং!